



Val av personnamn

Den nye lova om personnamn som blei sett i verk frå 2003, har meir liberale reglar enn den tidlegare. Det inneber òg at det har blitt mogleg å føre vidare fleire namnetradisjonar.

Liberaliseringa gjer det mogleg å få godkjent fleire uvande namneformer, og at det har blitt enklare å få etternamn som andre har. Nytt er det òg at vi kan få doble etternamn med bindestrek, og at vi kan modernisere skrivemåten i etternamnet vårt. Namnetradisjonar vi no kan føre vidare, er gamle etternamn i slekta, etternamn av foreldra sine førenamn med bl.a. endingane *-son* eller *-dotter*, og mange namneskikkar frå innvandarkulturane.

Nokre av reglane er omtalte meir nedanfor. Dei fleste eksempla på namn er ikkje henta frå namnesøknader, men sette inn her for å vise kva slag namn det gjeld. Tal på berarar i Noreg 1.1.2007 står i parentes.

Nylaga namn som ikkje blir godtekne

Både føre-, mellom- og etternamn kan bli avviste fordi dei kan vere til vesentleg ulempe for dei som skal ha namnet. Søkjarar kan rekne med å få avslag for namn med negativt innhald, som *Tristoglei*, *Teit*, og kombinasjonen *Gamle-Eirik* der kvart namn vil bli godteke elles. Sjukdomsnamn blir heller ikkje godkjende, som f.eks. *Influenta*.

Namn blir òg avviste av omsyn til andre enn søkjarane. Det kan vere støytande namn (*Satan*), bannord (*Fyfasan*), skjellsord (*Dumrian*), tabuord (*Pekken*) og titlar (*Prins*). Svært innvikla skrivemåtar blir òg avviste. Det kan vere mange konsonantar som gjer namnet vanskeleg å uttale eller hugse, som *Ffredrick* og *Qiwwwill*.

Nylaga namn som kan bli godtekne

Det hender folk ønskjer seg namn etter noko dei arbeider med, eller er opptekne av, eller dei vil ha andre nylaga namn. Ofte blir slike namn innvilga. Ein eplebonde har fått godkjent etternamnet *Eplet*. Ein togentusiast har fått *Tog* som mellomnamn.

Skikken med å kalle seg opp etter eigenskapar og yrke har funnest i mange land. Eksempel er det tyske *Stoltz*, som tyder 'stolt', og det nederlandske *Citroen*, som tyder 'sitron', og som opphavleg blei brukt som kallenamn for sitrondyrkarar eller for sure personar. Namn blir til på denne måten i mange kulturar i dag òg.

Slik namnelaging har det vore lite av i Noreg i mange hundre år, og det er ulike meiningar om det bør godtakast no. Innvendingar er bl.a. at det bryt med norsk namnetradisjon, og at slikt ikkje vil bli oppfatta som namn.

Førenamn

Som førenamn kan vi ikkje få etternamn, men det finst unntak for føre- og etternamn som heilt tilfeldig er like, f.eks. *Bjørn*, *Roald*, *Åse* og *Werner*. Vi kan heller ikkje få gutenamn som jentenamn og motsett. Det er unntak for namn som allereie er like for gutar og jenter, f.eks. *Kim*, *Iben*, *Inge* og *Tonny*.

Med den noverande lova kan vi meir enn før ta omsyn til kva kjønn namna blir brukte for utanfor Noreg.

Mellomnamn

Til mellomnamn kan vi få alle namn som vi kan få til etternamn, noko som er ei stor utviding frå før 2003. Mellomnamn har helst opphav i etternamn, som *Åsen* i namnerekkje *Ida Marie Åsen Haug*. Her er *Marie* førenamn nummer to.

Beskytta etternamn

Etternamn med 200 eller færre berarar er beskytta. Desse namna kan vi få som etternamn dersom alle som har dei som etternamn, godtek det. Dessutan kan vi få desse namna om vi oppfyller reglane om bruk tidlegare i slekta, slik det er omtalt nedanfor.

Kven som helst kan få etternamn som fleire enn 200 har. *Gimse* med 201 berarar (pr. 1.1.2007) er fritt, medan *Eidsvåg* med 200 berarar er beskytta. Tidlegare var denne grensa på 500.

Gamle etternamn og mellomnamn i slekta

Vi kan fritt få etternamn som ein i slektsledda heilt tilbake til tippoldeforeldra har hatt som etternamn eller mellomnamn. Mange brukar denne reglen for å byte ut vanlege sen-namn, som f.eks. *Olsen* og *Johansen*, med etternamn frå namn på gardsbruk, slik som *Vangsvik* (17) og *Fjeldvig* (30); etternamn frå utlandet, som *Schreiner* (117) og *Agerup* (123); eller sjeldne sen-namn, som *Antonisen* (58) og *Boasson* (27).

I mange tilfelle ønskjer søkjarar å ta vare på gamle etternamn som mellomnamn i staden for som etternamn. På den måten kan dei unngå eit stort namneskifte samstundes med at dei fører slektsarven vidare.

Moderne skrivemåtar i etternamn og mellomnamn

Det er mogleg å endre skrivemåten i mellomnamn og etternamn for å få dei meir like uttalen eller rettskrivinga. Det krevst ikkje godkjenning frå dei som har etternamn som er likt det namnet vi vil endre til, sjølv om det er beskytta. Slik kan vi få endra frå *Fjeldaas* (40) til *Fjellås* (43), frå *Ophuus* (32) til *Opphus* (18) og frå *Ihlebak* (81) til *Ilebekk* (117).

Doble etternamn med bindestrek

Ein mykje omtalt regel i den nye namnelova er doble etternamn med bindestrek. Det kan bli *Grønn-Jensen* når *Grønn* er etternamnet til mor, og far heiter *Jensen*. Ektefellar, eller sambuarar som har budd saman i minst to år eller har felles barn, kan slå saman namna sine, til f.eks. *Blåfjell-Gjerde*. Vi kan òg bruke namn frå tippoldeforeldra eller yngre slektsledd, eller få etternamn som ikkje er beskytta. Vi kan berre få to etternamn på denne måten.

Dei fleste familiane i Noreg som har doble etternamn med bindestrek frå tidlegare, har dei oftast frå før den første namnelova som kom i 1923.

Idasson og Mariusdotter

Vi kan òg få etternamn sette saman av namnet til mora eller faren vår og endingar som f.eks. *-son*, *-dotter*, *-sønn* og *-datter*. Tidlegare kunne vi få dei berre som mellomnamn.

Nokre skikkar i innvandrarkulturar

I mange kulturar kan namna til ein person vise fleire slektsledd. *Fatima Hussein Ahmed* er namnet til *Fatima* som kan vere dotter av *Hussein* og ha ein bestefar som heiter *Ahmed*. I nokre kulturar får kvinner ektemannens førenamn lagt til sitt eige. Ei som heiter *Devi* og er gift med *Nanda*, kan få namna *Devi Nanda*. I Noreg kan folk føre desse skikkane vidare, med sitt eige namn som førenamn og dei andre som mellom- og etternamn.

Søknader til folkeregisteret

Alle namneedringar og val av namn for barn søkjer vi om hos folkeregisteret.

© IvarUtne

Fleire opplysningar hos:

Ivar Utne,

Institutt for lingvistiske, litterære og estetiske studium (LLE), Universitetet i Bergen

e-post: ivar.utne@lle.uib.no

<http://www.uib.no/lle/ressurser/tjenester/personnavn>